

Inatsisartunut aalajangigassatut siunnersuutip, meeqqanut inuusuttunullu ikiorsiissutitut inatsisartut peqqussutaata allanngortinnissaanut Naalakkersuisunut aalajangiiffigissassatut siunnesuut, taamaasilluni inuusuttut 19-it 23-illu akornanni ukiullit angerlarsimaffiup avataanut inissineqarsimasut annertusakkamik suliniuteqareermermi malinnaatitsinermit inatsisunik tunngavissalikkamik neqeroorutit isumannaarneqassammata..

(Inatsisartunut ilaasortaq Olga P. Berthelsen, Inuit Ataqatigiit)

Akissutitut oqaaseqaat.

(Isumaginninnermit Naalakkersuisoq Maliina Abelsen)

Siullermeerneqarnera.

Inuit Ataqatigiinniit Olga P. Berthelsen aalajangiinissamut siunnersuutit assigiinngitsunik siunertallit eqqarsaatinillu uanga annertuumik paasisaqarfigisannik imalinnik saqqummiussineranut qutsaviginiarpara.

Soorlu Olga P. Berthelsenip siunnersuummini eqqaareeraa, ullumikkut suliniuteqareermermi malinnaatitsinermit inatsisini aalajangersagaqareerpoq. Inatsisartut peqqussutaat § 9 imm. 2 malillugu angajoqqaatut oqartussaassuseqartoq aamma meeraq 15-ileereersimasoq akuersiseqqaarlugit ikiorsiissutissaq meeqqap immikkut pisariaqartitsineranut naleqqunnerpaaq kom-munalbestyrelsip misissussavaa, siunissami meeqqap pisariaqartitaasa tunngavilersornissaannut periarfissat pisariaqartinneqarnerisut. Taassumalu ataani ilaatigut suliniuteqareermermi malinnaatitsineq periarfissanut ilaavortaaq.

Suliniuteqareermermi malinnaatitsinerup isumannaassavaa, assersuutigalugu inuusuttunnguit angajoqqaarsiani alliatortut atuarnermik ingerlateqqinnissaanut, suliffimmik sungiusarfissamik suliffissamullu atatillugu tapersersorneqarsinnaaniassammata. Aammattaaq inuusuttut inuttut attaveqatigiittarnikkut aningaasanullu tunngasutigut il.il atatillugu siunnersorneqarnikkut tapersersorneqarnissamik pisariaqartitsisinnaasarput. Tamakkununnga malittigitillugu suliniuteqareermermi malinnaatitsineq tassaavoq ataasiakkaanut sulissutiginninneq inuusuttut namminneq kissaataat pisariaqartitsinerallu malillugit iluarsartuussisoqartarlunilu nalilersuineqartarpoq.

Nummi angajoqqaarsiat peqatigiiffiata Nordic Foster Care Association-illu 2008-mi septembarimi Nummi Ilaqtariinnut Inissiisarneq pillugu Nunat Avannarliit Ataatsimeersuarnerannik aqqissuussipput. Ataatsimeersuarneq Katuami ingerlanneqarpoq, angajoqqaarsianit, pisortanut sinniisunit, kiisalu kommunit nunallu politikkeriinit peqataaffigineqartoq.

Ataatsimeersuarnermit nalunaarusiamut tapiliussami atuarneqarsinnaavoq, inuusuttut angajoqqaarsiamik qimareernerisa kingorna nammineersinnaanngitsunik arlalinnik assersuutissaqartoq. Ilaatigut ilaat atonerluisunngortarput ilinniakkaminnillu inaarinnissinnaanatik. Amerlasoorpassuartigullu meerarpassuit inuusuttorpasullu angajoqqaarsianut inissineqarsimasut inissinneqannginnerminni akornusereersimasarput, tamatumalu nassatarisarpaa 18-ilereer- tik qaangerlugu ikiorneqarnissamik tapersersorneqarnissamillu pisariaqartitsisarnarat. Taamatutaaq meeqqat paaqqinnittarfinnut inissinneqartartut ittarput.

Taamaattumik Olga P. Berthelsenip siunnersuutaa susassarinarlunilu naleqquppoq. Isumaqa-tigaara, suliniuteqareermermi malinnaatitsineq siunissami meeqqanut inuusuttunullu inatsise-qarnerup nutarternerani itinerusumik misissugassaassasoq. Tamakkununga tunngasutigut inatsiseqarnermut nutarterinissamik pisariaqartitsisoqarpoq, pisariaqartitsisoqarportaaq sulianut ilinniarsimasunik aqqissuussaaffiillu attuumassutillit ilanngutsitsinnissaat meeqqat inuusuttullu pisariaqartitaat aallaavigalugit inatsisiliornerup isumannaarnissaanut peqataasinnaasunik.

Kisianni inatsisinik allannguisarnek suliaavoq pisariullunilu atortussanik atuinartoq. Taamaat-tumik meeqqanut inuusuttunullu tunngasutigut inatsisiliorneq suliaalluartumik siunissamullu isumannaarinnittoq pisariaqartitsissaaq, piffissamik annertuumik inatsisiliornermut sulianut atuinissamut sulisussaqartitsinissamik immikkoortitsinissaaq. Ukiuni aggersuni inatsisiliorner-mut sulineq qitiutinniarpara, kisiannili maannakkorpiaq oqaatigisinnaanngilara qaqugu tamak-kuninnga suliaqarnek aallarnisarnekarlunilu naammassineqassanersoq.

Ajornartorsiutinut tikinneqartunut naleqqiullugu ilaqutarsiassanik meeqqanut inuusuttunullu sullissivinni sulisussanittaaq amigaateqarpuqut. Taamaattumik Naalakkersuisut kissaatigaat, meeqqanut inuusuttunullu aningaasaqarnermut sulisoqarnermullu tunngasutigut misissuinis-samut suliniuteqartoqassasoq, taamaasilluta tamakkununga tunngasutigut inatsisiliorneq aaq-qiinerlu periarfissaqartumik naammassineqarsinnaasumik pisariaqartitanullu tulluarsakkamik isumannaarniassagatsigu.

Tamatumalu tungaanut suliniutigissavara maannakkut inatsisiliornikkut periarfissaasut pitsaa-sumik atussagigut. Aningaasanut inatsimmi kontomi pingaarnermi 30.01.03-mi aningaasat 2010-imi meeqqanut inuusuttunullu tunngasunut isumaginnittut pikkorissarnissaannut immikkoortinneqarsimapput. Taakku pikkorissanerit suliassaasa ilaagaat suliniuteqareermermi malinnaatitsinerit suliniuteqareermermilu malinnaatitsinerit pitsaasumik sunniuteqartarneri ilisimatitsissutigissallugit.

Naggataatigullu erseqqissaatigissavara Olga P. Bertelsenip siunnersuutaa tikilluaqqugakku. Ukiuni aggersuni unammisassat naapitassagut akuerissallugit innuttaasut atortussa qarluartut pisariaqartippagut – isumannaassallugulu uagut inuiaqatigiisugut atortussa qarluartunik innuttallit pilersissallugit pisariaqartipparput.

Kisianni piffissaq isumaginninnermullu tunngasut pissutigalugit Naalakkersuisut siunnersuutigat, siunnersuutip isikkumisut isikkoqartillugu akuerineqassanngitsoq.